

ଫିଲିପୀୟମାନଙ୍କ ନିକଟକୁ ପାଉଲଙ୍କ ପତ୍ର ପିଲିପିୟ ଲୋକା ଲାକ୍ତୁ ପାଉଲତି ଆକୁ

ପିଲିପିୟ ଆକୁ ବିସୟତାନ୍ ଏସ ମାଟା

ଜିସୁ କ୍ରିସ୍ତଦି ଜନମ୍ଦି ପାକାପାକି ୬୧ ବାର୍ଷେକ୍ ଝେନ୍‌କା ପାଉଲ ପିଲିପି ମଣ୍ଡଲଦି ବିସ୍‌ବାସିରି ଲାକ୍ତୁ ଇୟା ବଇ ରାସ୍‌ତାନ୍ । ଆନାତ୍‌ସୁରି ପାଉଲ ରମ୍ ଗାଡ଼ୁ ଜଇଲ୍‌ତୁ ମାନିଝାଲେ ଝାନ୍ ଇୟା ବଇ ରାସ୍‌ତାମାର୍‌ଆନ୍ ୧:୧୩ ।

ପିଲିପି ଗାଡ଼ ଲୋଇ ନେ ତିଆରୁଆତି ମଣ୍ଡଲି ଲାକ୍ତୁ ଇୟା ବଇ ରାସାତା ମାର୍‌ହାଡ଼ । ମାପୁ ପ୍ରେରିତ ବଇଦୁ ବା ଏସ ବିସୟ ପିଲିପି ବଇ ବିସୟତାନ୍ ନେସ୍‌ତେଙ୍ଗ୍ ଆର୍‌ନିକା । ପିଲିପି ମାକିଦନିଆ ଦେସ୍‌ତି ପେରିଗାଡ଼ ମାର୍‌ଆଡ଼ । ଇକା ମାକିଦନିଆଦୁ ତିଆରୁଆତି ପାରୁତୁମ୍ ମଣ୍ଡଲି ମାର୍‌ଆଡ଼ । ପାଉଲ ମାରି ସିଲା ମିସାଜି ଇୟା ମଣ୍ଡଲି ଆରାମ୍ କିତାମାର୍‌ହାଡ଼ । ମାରି ଆବେନ୍‌ ତେବାନି ବେଡ଼ାଦୁ ଉନ୍‌ଡ୍ରେ ନାଡ଼ା ଉଣ୍ଡିଙ୍ଗ୍ ଝାରିଙ୍ଗ୍ ଜଇଲ୍‌ତୁ ଇର୍‌ତାମାର୍‌ଆର୍ ପ୍ରେରିତ ୧୬ ।

ଆଦେଙ୍ଗ୍ ଆର୍‌ନାଡ଼ ପାଉଲଦି ଇୟା ବଇ ରାସ୍‌ନି ନାଣ୍ଡ ଉଦେସ୍‌ ତେବାଦେଙ୍ଗ୍ ଆର୍‌ନେ । ଝାନ୍ ଜଇଲ୍‌ତୁ ମାନି ବିସୟ ଝେନ୍‌ଜି ମଣ୍ଡଲିଦି ଲୋକୁ ଦାନ୍ ଉଣ୍ଡା କିଜି ପୋକ୍‌ତି ମାନିଙ୍ଗ୍ ମଣ୍ଡଲିଦିଙ୍ଗ୍ ଦନ୍‌ୟବାଦ୍ ସିନି ଉଦେସ୍‌ ଇଡ଼ଜି ବଇ ରାସ୍‌ନାନ୍ ୪:୧୦-୧୯ । ଝାନ୍ ବା ଝାନି ଜଇଲ୍‌ତୁ ମାନି ଅବସ୍ତାଦି ବାଦା ଝେର୍‌ସି ମଣ୍ଡଲିଦୁ ତିମତି ମାରି ଏପାପ୍‌ଦିତଦିଙ୍ଗ୍ ମିସା କିନାନ୍, ବିସ୍‌ବାସ୍‌ସିର୍ ଏଣ୍ଡେସ୍ ଝାରିଙ୍ଗ୍ ମାନାଜି ନମସ୍କାର୍ କିନାନ୍ ମାରି ଝାନି ଉଣ୍ଡିଙ୍ଗ୍ ସନ୍‌ମାନ୍ ସିନାନ୍ ୨:୧୯-୩୦ ।

ଇୟା ବଇଦୁ ମାନି ଏସ ମୁକିୟ ବିସୟ

୧. ପିଲିପିୟ ମଣ୍ଡଲିଦିଙ୍ଗ୍ ପାଉଲଦି ମାଡ଼ିସ୍‌କିନିକା ୧:୧-୨

୨. ପାଉଲଦି ବାଦା ମାରି ଝାନି ସିନ୍ତା ବିସୟ ୧:୩-୨:୩

୩. ବିସ୍‌ବାସିରିଙ୍ଗ୍ କ୍ରିସ୍ତୁଆନ୍ ଜିବନ୍ ଜିନିମାଡ଼ିନି ଉଣ୍ଡିଙ୍ଗ୍ ପାଉଲଦି ମାଟା । ୩:୧-୪:୯

୪. ପାଉଲ ଦାନ ଉଣ୍ଡିଙ୍ଗ ପିଲିପିୟ ମଣ୍ଡଲିଦିଙ୍ଗ ମାଡ଼ିସ୍କିଜି ମାରି ଦନ୍ୟବାଦ ସିନାନ୍ ୪:୧୦-୨୩

ନମସ୍କାର ନି ପାଉଲତି ପାରତନା

୧ ✧ ପାଉଲ ମାରି ତିମତି, କ୍ରିସ୍ତ ଜିସୁଦି ରିଏର୍ ଦାସ୍କୁ, ପିଲିପି ମଣ୍ଡଲିଦୁ ମାନି କ୍ରିସ୍ତ ଜିସୁଦି ମାନି ଝିଜେରେ ସାଦୁରି ଲାକ୍ତୁ ମାରି ନେତାର ମାରି ସେବାକିନିଝାରି ଲାକ୍ତୁ ରାସ୍‌ସିନାନ୍;

୨ ମା ବୁବା ମାପୁରୁ ମାରି ପ୍ରବୁ ଜିସୁ କ୍ରିସ୍ତଦିମାଣ୍ଟୁ ଦୟା ମାରି ସାନ୍ତି ମି ଉଣ୍ଡିଙ୍ଗ ଆପିଡ଼ ।

୩ ନାନ୍ ମିଙ୍ଗ୍ ଏସ ଦେବେଙ୍ଗ୍ ଏଡ଼କିନା, ନାସ ଦେବେଙ୍ଗ୍ ନା ମାପୁରୁଙ୍ଗ୍ ଦନ୍ୟବାଦ ସିନା ।

୪ ଝିଜୁ ଦେବେଙ୍ଗ୍ ମି ଉଣ୍ଡିଙ୍ଗ ପାରତନା କିନି ବେଡ଼ାଦୁ ଝେଡ଼ିକାଦି ମୋନ୍‌ତାନ୍ ପାରତନା କିଜିନା,

୫ ଇରିଙ୍ଗ୍ ମି ବିସ୍‌ବାସ୍ ଆରାମ୍‌ତାନ୍ ନେର୍‌ସାନ୍ସି ସୁସମାଚାରତି ପାଣିଦୁ ମିର୍ ନାଙ୍ଗ୍ ଏଣ୍ଡେସ୍ ସାକା ଆତିମାନିଦେର୍,

୬ ନାନ୍ ଇୟା ବିସୟ୍‌ତାନ୍ ସଡ଼ ଜେ, ଆମା ପ୍ରବୁ ମି ଲାକ୍ତୁ ଇୟା ନେଗିପାଣି ଆରାମ୍ କିତାମାନାନ୍, କ୍ରିସ୍ତ ଜିସୁ ମାରିଡେସିଝାନି ଦିନ୍‌ଡୁ ଇକା ସେସ୍ ଆନି ସାନ୍ସି ଝାନ୍ ଆକା ପାଣି କିଜି ପୁରା କିନାନ୍ ।

୭ ମିର୍ ଝିଜୁଦିନ୍ ନା ମନ୍‌ଡୁ ମାନିଦେର୍; ମାରି ମି ଝିଜୁଲୋକା ବିସୟ୍‌ତାନ୍ ଇୟାଝାଜା ଏଡ଼ କିନିକା ମାନାଡ଼ । ନାନ୍ ଜଇଲ୍‌ଡୁ ସଲ୍‌ଜ ମାର୍‌ଇ ବେଡ଼ାଦୁ ମାରି ଇଲେଇ ଇୟା ଜଇଲ୍‌ଡୁମାନି ଅବସ୍ଥାଦୁ ସୁସମାଚାରତି ତିଆର୍‌କିନିକା ନି ରକ୍ଷାଦି ଉଣ୍ଡିଙ୍ଗ ପାଣି କିଦେଙ୍ଗ୍ ମାପୁରୁ ନାଙ୍ଗ୍ ଆମା ଦୟା ସିତାମାନାନ୍, ମିର୍ ଝିଜିଦେର୍ ଇବେନ୍‌ ନିସାତିମାନିଦେର୍ ।

୮ ମି ଝିଜେରି ଉଣ୍ଡିଙ୍ଗ ନା ନାଣ୍ଡ ଝେଡ଼ିକା ଜିସୁ କ୍ରିସ୍ତଦିମାଣ୍ଟୁ ନାନ୍ ପୟ୍‌ତାମାନା ଇଜି ଏସ୍‌ିଝାଲେ ନାନ୍ ଝେର୍‌ନା, ଇକା ପୁରାସଡ଼ । ଇୟା ବିସୟ୍‌ତାନ୍ ମାପୁରୁ ନା ସାକି ।

୯ ମାରି, ନାନ୍ ପାର୍‌ତାନା କିଜିନା, ଏଣ୍ଡେସ୍ ସଡ଼ତି ବୁଦି ମାରି ନିୟାୟ୍‌ ବିଚାରତି ଝାଲେ ମି ଜିବନ୍‌ନୋନିକା ନାଣ୍ଡଦାନ୍ ନାଣ୍ଡ ପିରିଡ଼,

୧୦ ଏଣେସ୍ ମିର ନେଗି ବିସୟକୁ ଝିକୁ ଆସକିଦେଇ ଆବନିଦେର । ଆରତିଙ୍ଗ, ମିର କ୍ରିସ୍ତଦି ଖାନିଦିନ୍ତୁ ପୁରାନେଗେନ୍ତାନ ମାରି ନିନ୍ଦାସିଲିକା ତେବାନିଦେର,

୧୧ ମାରି, ମାପୁରୁଦି ଗୌରବ୍ ମାରି ଦନ୍ୟବାଦତି ଉଣ୍ଡିଙ୍ଗ୍ ମି ଜିବନ୍ ଜିସୁ କ୍ରିସ୍ତଦି ସିତିମାନି ଝିକୁ ନେଗିଗୁଣୁତୁ ପୁରା ଆନାଡ୍ ।

ଜିନି ଅର୍ତ୍ତ କ୍ରିସ୍ତ

୧୨ ଏ ତଡ଼ାନକୁ ନି ତାଙ୍ଗ୍‌କି, ନା ଉଣ୍ଡିଙ୍ଗ୍ ଆମା ଆମାକା ଗଟାତାମାନାଡ୍, ଆକା ସୁସମାଚାରୁତି ପାଣିଦିଙ୍ଗ୍ ପିରନି ଉଣ୍ଡିଙ୍ଗ୍ ସାହାଜ୍ୟ କିତାମାନାଡ୍, ଇକା ମିଙ୍ଗ୍ ଝେରତେଙ୍ଗ୍ ନାନ୍ ଇଚ୍ଛା କିଜିନା ।

୧୩ ☆ଇବେଣି ଝିଜେରେ ରାଜାରି ମେଡ଼ଇଲୁଦିଙ୍ଗ୍ କାପ୍‌କିନିକାର୍ ମାରି ଆଇକାର୍ ଝିଜେରେ ନେସ୍‌ତାମାନାର୍ ଜେ, କ୍ରିସ୍ତଦି ସେବାକିନିକାନ୍ ଆତିମାନିଙ୍ଗ୍ ନାନ୍ ଇଲେଇ ଜଇଲୁତୁ ମାନା ।

୧୪ ମାତର୍ ନାନ୍ ଜଇଲୁତୁ ମାନିଙ୍ଗ୍ ଏସଲୋକ୍ ତଡ଼ାନକୁ ନି ତାଙ୍ଗ୍‌କି ପ୍ରବୁଦି ଉଣ୍ଡିଙ୍ଗ୍ ନାଣ୍ ବିସ୍‌ବାସ୍ କିତାମାନାର୍, ମାରି ଇୟାଉଣ୍ଡିଙ୍ଗ୍ ତିଲାଏଣ୍‌ଗା ମାପୁରୁଦି ବାକ୍ୟ ପ୍ରଚାର୍ କିଦେଙ୍ଗ୍ ଝାର୍ ସାହାସ୍ ପୟ୍‌ତାମାନାର୍ ।

୧୫ ଅବସ୍ୟ ଝାରି ଲୋଇରାନ୍ ଏନ୍ ଏନ୍ ଗିଦ୍‌ରି ମାରି ଲାଗାଜିସାନି ଉଣ୍ଡିଙ୍ଗ୍ କ୍ରିସ୍ତଙ୍ଗ୍ ପ୍ରଚାର୍ କିଜିନାର୍ ସଡ୍, ମାତର୍ ମାରି ଏନ୍ ଏନ୍ ଜିବନ୍‌ତାନ୍ ଆକା କିଜିନାର୍ ।

୧୬ ଇୟାକାର୍ ଇୟାଝାଜା କିନି ଉଣ୍ଡିଙ୍ଗ୍ ଜିବନ୍‌ନୋନାର୍ । ଇରିଙ୍ଗ୍ ଝାର୍ ନେସ୍‌ନାର୍ ଜେ, ମାପୁରୁ ନାଙ୍ଗ୍ ସୁସମାଚାରୁତିଙ୍ଗ୍ ସୁରକ୍ଷା କିଦେଙ୍ଗ୍ ଦାଇଡ୍ ସିତାମାନାନ୍ ।

୧୭ ଆଇକାର୍ ବିସ୍‌ବାସ୍‌ତାନ୍ କ୍ରିସ୍ତଦି ମାଟା ପ୍ରଚାର୍ କିଏଣ୍‌ଗା ଆକାରୁତି ଉଦେସ୍ ଅସି ଆକା କିତାମାନାର୍ । ନାନ୍ ଜଇଲୁତୁ ତେବାତିମାର୍‌ଇ ଝାଲେ ନା ମୋନ୍‌ତୁ ନାଣ୍ କାସ୍‌ ସିଦେଙ୍ଗ୍ ଝାର୍ ଆକା କିତା ମାନାର୍ ।

୧୮ ଆବେନ୍ ଇନିକା ପୁର୍‌ଏଡ୍ ! ଉଦେସ୍‌ଦି ଇସାବ୍‌ତାନ୍ ଆପିଡ୍ ମାରି ନେଗେନ୍‌ଡି ଇସାବ୍‌ତାନ୍ ଆପିଡ୍, ଏଣେସ୍‌ଝାଜାଦାନ୍‌ବା କ୍ରିସ୍ତ

ପ୍ରଚାରିତ ଆଜିନାନ୍, ଇବେନ୍ତୁ ନାନ୍ ଖେଡ଼ିକା କିଜିନା, ହୁଁ, ଖେଡ଼ିକା କିଜିନା ।

^{୧୯} ଇରିଙ୍ଗ ନାନ୍ ନେସନା ଜେ, ମି ପାର୍ତନା ମାରି ଜିସୁ କ୍ରିସ୍ତୁ ଆମ୍ବାଦି ସାହାଜ୍ୟ ଦାନ ନାନ୍ ମୁକୁଡ଼ାନିକା ଲାବ୍ କିନା ।

^{୨୦} ଇୟା ବିସୟତାନ୍ ନା ଅରେନ୍ ଆସାନି ଆସା ଇଡ଼ନି ମାନାଡ଼ ଜେ ନାନ୍ ଇନି ବିସୟତାନ୍ ସେମାର୍ ଆଏ, ମାତର୍ ଝିଜୁଦିନ୍ ଏଣ୍ଡେସ୍‌ଜା, ଇଲେଇବା ଆୟାଝାଜା ନାଣ୍ଡୁ ତାଟ୍‌ତାନ୍, ଜିବନ୍‌ତୁ ଆପିଡ଼ ବା ସାନିମାନ୍ ଆପିଡ଼, କ୍ରିସ୍ତୁ ନା ମେନ୍‌ଲତାନ୍ ମହିମା କିନା ।

^{୨୧} ଇରିଙ୍ଗ ନା ଜିବନ୍‌ତୁ କ୍ରିସ୍ତୁନେ ଝିଜୁ, ଆଦେଙ୍ଗ୍ ନା ଉଣ୍ଡିଙ୍ଗ୍ ସାନିକା ନାଣ୍ଡୁ ଲାବ୍ ଆନାଡ଼ ।

^{୨୨} ମାତର୍ ଜଦି ଜିବନ୍ ମାନଞ୍ଜି ନାନ୍ ନାଣ୍ଡୁ ପଲ୍‌ଆସନି ପାଣି କିଦେଙ୍ଗ୍ ଆଟ୍‌ନା, ଆରତିଙ୍ଗ୍ ଜିବନ୍ ନି ସାନିତାନିଙ୍ଗ୍ ଏଙ୍ଗ୍ ଆସକିନା, ନାନ୍ ଟିକ୍ କିଦେଙ୍ଗ୍ ଆଟ୍‌ଏଜିନା ।

^{୨୩} ନାନ୍ ରୁଣ୍ଡି ବିସୟକୁ ଅସି ପେରିଆରଲାଦୁ ପଡ଼େଆତାମାନା; ଇୟା ଜିବନ୍ ଡିସସୋ କ୍ରିସ୍ତୁ ଖାଲେ ତେବାଦେଙ୍ଗ୍ ନା ଇଛା, ଇରିଙ୍ଗ୍ ଆକା ପୁରା ନେଗେଡ଼ ।

^{୨୪} ମାତର୍ ମି ଉଣ୍ଡିଙ୍ଗ୍ ଜିଜୋ ତେବାଦେଙ୍ଗ୍ ନାଣ୍ଡୁ ଦର୍କାର ।

^{୨୫} ମାରି ନାନ୍ ଇୟା ବିସୟତାନ୍ ନେସନା ଜେ, ନାନ୍ ଜିନା ତେବାନା । ମି ବିସବାସତି ପିରନିକା ମାରି ଖେଡ଼ିକାଦି ଉଣ୍ଡିଙ୍ଗ୍ ନାନ୍ ମି ଝିଜେରି ଖାଲେ ତେବାନା ।

^{୨୬} ଏଣ୍ଡେସ୍ ମି ମାନ୍ତୁ ନାନ୍ତୁ ମାରିଡ଼େସି ଇଗାଝାନି ଉଣ୍ଡିଙ୍ଗ୍ ନା ମାଣ୍ଡୁ କ୍ରିସ୍ତୁ ଜିସୁଦିମାନ୍ତୁ ମି ଗର୍ବ ନାଣ୍ଡୁ ବଡ଼େ ଆନାଡ଼ ।

^{୨୭} ନାନ୍ ମିଙ୍ଗ୍ ସୁଡ଼ୁଦେଙ୍ଗ୍ ଇଜି ସନ୍‌ଡେଙ୍ଗ୍ ତାଟ୍ ଆନା ସିଲିତିଙ୍ଗ୍ ଆଏ, ଇଲେଇ ପେରି ବିସୟ ଆଜିନାଡ଼, ମି ଜିବନ୍ ଜିନିକା ଏଣ୍ଡେସ୍ କ୍ରିସ୍ତୁ ସୁସମାଚାରତି ଖାଜା ଆନାଡ଼ ନାନ୍ ଏଣ୍ଡେସ୍ ଝେନା, ମିର୍ ଉନ୍‌ଡ଼ି ଉଦେସ୍ ଅସି ତାଟ୍‌ତାନ୍ ନିରଇ ମାନିଦେର୍ ମାରି ଉନ୍‌ଡ଼ି ଆସା ଅସି ସୁସମାଚାର ବିସବାସତି ଉଣ୍ଡିଙ୍ଗ୍ ଅର୍‌ସେ ଜୁଦ୍ କିଜିନିଦେର୍ ।

^{୨୮} ସାଡୁରିଙ୍ଗ୍ ଡିଲ୍‌ମାଟ୍, ସାହାସ୍‌ତାନ୍ ତାଟ୍ ତେବାଦୁ । ଆରତିଙ୍ଗ୍, ଖାର୍ ନେସତେଙ୍ଗ୍ ଆଟ୍‌ନାର୍ ଜେ, ଖାର୍ ଆରନିକା ପୁରାସଡ଼ ମାରି ମିର୍ ଜିଣାନିଦେର୍, ଇରିଙ୍ଗ୍ ମାପୁରୁ ନେ ମିଙ୍ଗ୍ ଜିଣା କିନା ।

୨୯ ଇରିଙ୍ଗ କ୍ରିସ୍ତଦିମାନୁ କେବଲ ବିସବାସ କିନି ଉଣ୍ଡିଙ୍ଗ ମିଙ୍ଗ ଜେ ସୁଜୋଗ୍ ସିଆୟାଆତା ମାନାଡ଼, ଆକା ସିଲେ, ମାତର୍ କ୍ରିସ୍ତଦି ଉଣ୍ଡିଙ୍ଗ ଦୁଃକକାସୁ ବୋଗାନି ଉଣ୍ଡିଙ୍ଗ ମିଙ୍ଗ ସୁଜୋଗ୍ ସିଆୟାଆତା ମାନାଡ଼ ।

୩୦ ଇଲେଇ ଇୟା ଜୁଦ୍‌ଦୁ ମିର୍ ନାମାନୁ ମିସାଦେଙ୍ଗ ଆଟ୍‌ନିଦେର୍ । ସର୍‌ଇଦିନୁ ମିର୍ ନାଙ୍ଗ ଆମା ଜୁଦ୍ କିନିକା ସୁଡ଼ୁମାରୁଇଦେର୍, ଇଲେଇବା ନାନ୍ ଆୟା ଜୁଦ୍‌ଦୁ ପୁରା ମାନା ଇଜି ମିର୍ ଝେନିମାନିଦେର୍ ।

୨

କ୍ରିସ୍ତଦି ସାନ୍ତି ମାରି ପେରିକାନ୍

୧ କ୍ରିସ୍ତଦି ଖାଲେ ମିସାନି ଉଣ୍ଡିଙ୍ଗ ମିର୍ ଜିବନ୍‌ତୁ ବପୁ ଆତିମାନିଦେର୍ । ମାରି ଖାନି ଜିବନ୍‌ନୋନିକା ମିଙ୍ଗ ଝେଡ଼ିକା ସିଜିନାଡ଼ । ମିର୍ ପବିତ୍ରଆମ୍‌ଦି ସାକାଦାନ୍ ଝେଡ଼ିକା କିଜିନିଦେର୍ ମାରି ନିଜେନିଜେଦି ଉଣ୍ଡିଙ୍ଗ ମିଙ୍ଗ ଜିବନ୍‌ନୋନିକା ମାରି ଦୟା ମାନାଡ଼ ।

୨ ଆଦେଙ୍ଗ ନାନ୍ ମିଙ୍ଗ ଅନୁରଦ୍ କିଜିନା, ଉନ୍‌ଡ୍ରେ ମନ୍‌ତାନ୍, ଉନ୍‌ଡ୍ରେ ଜିବନ୍‌ନୋନିମାନୁ ମିସାନିକା ମାରି ଉନ୍‌ଡ୍ରେମୋନ୍ ମାରି ଆମ୍‌ଦୁ ଅର୍‌ସେ ଆଜି ମିର୍ ନାଙ୍ଗ ପୁରା ଝେଡ଼ିକା କିଦୁ ।

୩ ଆକାର୍ ମାରି ନାଣ୍ଟ ଗର୍ବ ତରାନି ଉଣ୍ଡିଙ୍ଗ ଇନି ପାଣି କିମାଟ୍, ମାତର୍ ନମ୍ର ଆଜି ଝିଜେରେ ଆଇଝାରିଙ୍ଗ ନିଜେଦିମାଣ୍ଟୁ ପେରିକାନ୍ ଅଡ଼ବିଦୁ ।

୪ କେବଲ ନିଜେଦି ବିସୟୁତୁ ମୋନ୍ ସିଏଣ୍‌ଗା ଆଇଝାରି ବିସୟୁତୁ ବା ମୋନ୍‌ସିଦୁ ।

୫ କ୍ରିସ୍ତ ଜିସୁଦି ଏଣ୍ଡେସ୍ ନାନି ମନ୍ ମାରାଡ଼, ମିଦି ଆୟାଝାଜା ମୋନ୍ ଆପିଡ଼ :

୬ ଝାନ୍ ମାପୁରୁଝାଜା ଆତିଙ୍ଗବା

ମାପୁରୁଦି ଖାଲେ ସାମାନ୍ ଆଜି ତେବାଦେଙ୍ଗ ନିଜେଦି ଉଣ୍ଡିଙ୍ଗ ଆସ୍‌ସୋ ଇଡ଼ିନି ବିସୟୁ ଏଡ଼ କିଏତାନ୍ ।

୭ ବର୍‌ ନିଜେଦି ଇଚ୍ଛାଦାନ୍ ଝାନି ଝିଜୁ ଡିସ୍‌ତାନ୍‌ନୋ ସାକର୍ ମୁଟ୍ ଆସ୍‌ତା ଝାତାନ୍ ।

ଲୋକା ଝାଜା ଆଜି ଲୋକା ଝାଜାତର୍‌ଜି ଝାତାନ୍ ।

୮ ମାରି, ଖାନ୍ ସାନ୍ତି ମାରି ସାନ୍ତିଦିକାନ୍ ଆଜି ସାନି ସାନ୍ତି,
କୁସଦୁ ସାନି ସାନ୍ତି ମାନାତାନ୍ ।

୯ ଇୟାଉଣ୍ଟିଙ୍ଗ୍ ମାପୁରୁ ଖାନିଙ୍ଗ୍ ପୁରାନାଣ୍ଟ ମୁସକୁ ପେରତା ମାନାନ୍,
ମାରି ଝିଜେରି ଦରକା ବାଦ୍‌ଲୁ ପେରି ଦରୁ ଖାନିଙ୍ଗ୍ ସିତାମାନାନ୍
।

୧୦ ଏଣ୍ଟେସ୍ ମୁସକୁପୁର, ଦୁନିଆ ମାରି ପାତାଲୁତୁ ମାନି
ଝିଜୁ ଲୋକୁ ଜିସୁଦି ଦରତିଙ୍ଗ୍ ମେଣ୍ଟେଙ୍ଗ୍ ଗଟ୍‌କିଜି ମାଡ଼ିସ୍
କିନାର ।

୧୧ ମାରି, ବୁବା ମାପୁରୁଦି ଗୌରବତି ଉଣ୍ଟିଙ୍ଗ୍
ଝିଜେରି ଝେତଲ୍ ଜିସୁ କ୍ରିସ୍ତ ପ୍ରବୁ ଇଜି ମାନାନାର ।

ଦୁନିଆଦୁ ଜାୟ ଖାଜା କାସ୍‌ତୁ

୧୨ ମାରି, ଏ ନା ଲାଡ଼ତି ତଡ଼କୁ, ଏଣ୍ଟେସ୍ ନାନ୍ ମି ଖାଲେ ମାରୁଇ
ବେଡାଦୁ ମିର୍ ଏଣ୍ଟେସ୍ ଝିଜୁଖାଲେ ନା ମାଟାଦାନ୍ ମାରୁଇଦେର୍,
ମାତର୍ ଇଲେଇ ନାନ୍ ସିଲିଖାଲେ ମାରି ନାଣ୍ଟଦାନ୍ ତିଲାଜି ମାରି
ତିରୁଜି ନିଜେ ନିଜେଦି ପରିତ୍ରାଣ୍ ପାଣି ଏଣ୍ଟେସ୍ ପୁରା ଆନାଡ଼ ।

୧୩ ଇରିଙ୍ଗ୍ ଇଚ୍ଛା କିଦେଙ୍ଗ୍ ମାରି ପାଣି କିଦେଙ୍ଗ୍ ମାପୁରୁ ନିଜେଦି
ନେଗି ଉଦେସ୍‌ଦିଙ୍ଗ୍ ପୁରା କିନି ଉଣ୍ଟିଙ୍ଗ୍ ମି ଜିବନ୍‌ତୁ ପାଣି କିନାନ୍ ।

୧୪ ଆସ୍‌କିଏଣ୍‌ଗା ମାରି ଖାରଗିଜିସାଏଣ୍‌ଗା ଝିଜୁ ପାଣି କିଦୁ ।

୧୫ ଆର୍‌ତିଙ୍ଗ୍, ଇୟା କାକୁତ୍ ମାରି ପାପ୍‌ମାନି ଦୁନିଆଦୁ ମିର୍
ମାପୁରୁଦି ଦାମ୍‌ କଡ଼କକ୍‌ରା ଖାଜା ଦସ୍‌ସିଲିକା ମାରି ଦାମ୍‌ଦାନ୍ ଜିଜି
ମାଡ଼ିଦେଙ୍ଗ୍ ଆର୍‌ନିଦେର୍ ।

୧୬ ଆଇଝାରି ଲାକ୍‌ତୁ ଜିବନ୍‌ମାନି କାରୁର୍ ପ୍ରଚାର୍ କିନିଖାଲେ ମିର୍
ବାଦଡ଼ତିଙ୍ଗ୍ ଜାୟ କିଜିମାନି ସୁକେଙ୍ଗ୍ ଖାଜା ଜାୟ ଆନିକା ମାନାଡ଼ ।
ମିର୍ ଜଦି ଇୟାଖାଜା ଆନିଦେର୍, “କ୍ରିସ୍ତଦି ଦିନ୍‌ତୁ” ମି ବିସ୍‌ୟୁଟୁ ନାନ୍
ଗର୍ବ କିଦେଙ୍ଗ୍ ଆଟ୍‌ନା, ଇରିଙ୍ଗ୍ ଇବେଣ୍‌କୁ ପାର୍‌ମାଣ୍ ଆନାଡ଼ ଜେ, ନା
ଝିଜୁ ଜୋଜନା ମାରି ପାଣି ଆରେଏ ଆଏଡ଼ ।

୧୭ ମାପୁରୁଦି ଉଦେସ୍‌ତାନ୍ ମି ବିସ୍‌ବାସ୍‌ଖାଜା ବଲିଦାନ୍‌ତୁ
ଆନାଡ଼ସୁଗି ନା ଜିବନ୍‌ତି ନେତେର୍ ଖାକ୍‌ସୋ ସିଦେଙ୍ଗ୍ ପଡ଼ାନାଡ଼,
ଆର୍‌ତିଙ୍ଗ୍ ନାନ୍ ଝେଡ଼ିକା କିଜିନା ମାରି ନା ଇୟା ଝେଡ଼ିକାଦୁ ମିଙ୍ଗ୍
ମିସା କିଦେଙ୍ଗ୍ ଅଡ଼ବିଜିନା ।

୧୮ ମାରି, ଆୟାଞ୍ଜାଳା ମିର୍ ବା ଖେଡ଼ିକା କିନ୍ତୁ ମାରି ଆୟା ଖେଡ଼ିକାଦୁ ନାଙ୍ଗି ବା ମିସାକିଦୁ ।

ତିମତି ମାରି ଏପାପ୍ରଦିଡ଼

୧୯ ମାତର ନାନ୍ ମି ଲାକ୍ତୁ ତିମତିଦିଙ୍ଗ ବେଗି ପୋକ୍ନା ଇଜି ପ୍ରବୁ ଜିସୁଦିମାନୁ ଆସା କିଜିନା, ଏଣ୍ଡେସ୍ ମି କାବୁର ନେସ୍ସି ନାନ୍ ବା ଖେଡ଼ିକା ଆନା ।

୨୦ ଇରିଙ୍ଗ୍ ଖାନ୍ ମି ବିସୟ୍ତୁ ସଡ଼ତାନ୍ ମୋନ୍ଦିୟାନ୍ କିନାନ୍, ଇୟାଞ୍ଜାଳା ଅଡ଼ିବିନି ଲୋକ୍ ଖାନିଙ୍ଗ୍ ଡିସ୍ତିଙ୍ଗ୍ ନା ଲାକ୍ତୁ ଏନ୍ ସିଲେନ୍ ।

୨୧ ଆଇକାର୍ ଝିଜେରେ ଜିସୁ କ୍ରିସ୍ତଦି ଉଣ୍ଡିଙ୍ଗ୍ ମୋନ୍ଦିୟାନ୍ କିଏଣ୍ଗା କେବଲ ନିଜେଦି ପାଣିଦି ଉଣ୍ଡିଙ୍ଗ୍ ଦାନ୍ଧା ଆନାର୍ ।

୨୨ ତିମତି ଜେ ପରିକାଦୁ ଜିଣାତି ଲୋକ୍, ଇକା ମିର୍ ନେସ୍ତିମାନିଦେର୍; ମାରିନ୍ ବୁବାଦି ସେବା କିତି ଖାଜା ଖାନ୍ ତୋ ସୁସମାଚାର୍ ପ୍ରଚାର୍ ପାଣିଦୁ ନା ଖାଲେ ସେବା କିତାମାହ୍ନାନ୍ ।

୨୩ ମାରି, ନା ଉଣ୍ଡିଙ୍ଗ୍ ଇନିକା ଗଟାନ୍ଦାଡ଼, ଆକା ନେସ୍ତି ଉଣ୍ଡିଙ୍ଗ୍ ନାନ୍ ଖାନିଙ୍ଗ୍ ମି ଲାକ୍ତୁ ପୋକ୍ତାନା ଇଜି ଆସା କିଜିନା ।

୨୪ ମାତର ନାନ୍ ପ୍ରବୁଦିମାନୁ ବିସ୍ବାସ୍ କିଜିନା ଜେ, ନାନ୍ ନିଜେ ବା ଦାପ୍ରେ ମି ଲାକ୍ତୁ ଖାଦେଙ୍ଗ୍ ଆଟ୍ନା ।

୨୫ ମାତର ନାନ୍ ନା ତଡ଼ାନ୍, ଅରସେପାଣିକିନାପ୍, ଜୁଦ୍ ମାରି ନା ଅବାବ୍ ପୁରା କିନି ଉଣ୍ଡିଙ୍ଗ୍ ମି କାବୁର ଅନିକାନ୍ ମାରି ସେବାକିନି ଏପାପ୍ରଦିଡ଼ିଙ୍ଗ୍ ମି ଲାକ୍ତୁ ପୋକ୍ନି ଉଣ୍ଡିଙ୍ଗ୍ ଦରକାର୍ ଇଜି ଏଡ଼ କିତା ।

୨୬ ଇରିଙ୍ଗ୍ ଖାନ୍ ମିଙ୍ଗି ସୁଡ଼ନ୍ତି ଉଣ୍ଡିଙ୍ଗ୍ ଇଚ୍ଛା କିଜିନାନ୍, ମାରି ଖାନ୍ ନବ୍ଆତାମାନାନ୍ ଇଜି ମିର୍ ଖେରଇମାନିଙ୍ଗ୍ ଖାନ୍ ଦୁଃକ୍କିଜିନାନ୍ ।

୨୭ ସଡ଼ତାନ୍ ଖାନ୍ ନବ୍ଆଜି ସାତିଖାଜା ଆତାମାର୍ହାନ୍, ମାତର ମାପୁରୁ ଖାନିଙ୍ଗ୍ ଦୟା କିତାନ୍, ମାରି କେବଲ ଖାନିଙ୍ଗ୍ ସିଲେ, ମାତର ଏଣ୍ଡେସ୍ ନା ଉଣ୍ଡିଙ୍ଗ୍ ଦୁଃକ୍ ମୁସ୍କୁ ଦୁଃକ୍ ଗଟାଏଡ଼, ଇୟାଉଣ୍ଡିଙ୍ଗ୍ ନା ମୁସ୍କୁ ବା ଦୟା କିତାନ୍ ।

୨୮ ଇୟାଉଣ୍ଟିଙ୍ଗ୍ ନାନ୍ ଖାନିଙ୍ଗ୍ ମି ଲାକ୍ତୁ ପୋକ୍ତାନି ଉଣ୍ଟିଙ୍ଗ୍ ଇଚ୍ଛା, ଇରିଙ୍ଗ୍ ମିର୍ ଏଣ୍ଡେସ୍ ଖାନିଙ୍ଗ୍ ମାରିଡେସି ସୁଡ଼ୁଛି ଖେଡ଼ିକା ଆନିଦେର୍ ମାରି ନା ଦୁଃକ୍ ବା ଉଣା ଆନାଡ଼ ।

୨୯ ଆଦେଙ୍ଗ୍ ଅରେନ୍ କ୍ରିସ୍ତବିସ୍ବାସ୍ବି ତଡ଼ାନ୍ ଖାଜା ମିର୍ ଖାନିଙ୍ଗ୍ ମାନାଦୁ ମାରି ଖାନି ଖାଜା ଖିଜୁ ଗୁଣୁମାନି ଲୋକ୍ତିଙ୍ଗ୍ ସନ୍ମାନ କିଦୁ ।

୩୦ ଇରିଙ୍ଗ୍ ମିର୍ ନାଙ୍ଗ୍ ଆମା ସେବା ସିଦେଙ୍ଗ୍ ଆଟ୍‌ଇତିଦେର୍, କ୍ରିସ୍ତବି ପାଣି ପୁରା କିନି ଉଣ୍ଟିଙ୍ଗ୍ ଖାନ୍ ଆକା ନା ଉଣ୍ଟିଙ୍ଗ୍ କିଦେଙ୍ଗ୍ ସର୍ହାନ୍‌ନୋ ନିଜେଦି ଜିବନ୍ତିଙ୍ଗ୍ ନାସ୍ତକିଜି ସାନି ଆଗ୍ତିସାମାନା କିତାମାର୍ହାନ୍ ।

୩

ସତ୍ତି ଦାମ୍

୧ ସାରାସାରିଖେନକା, ଏ ନା ତଡ଼ାନ୍‌କୁ ନି ତାଙ୍ଗ୍ କି, ପ୍ରବୁଦିମାନୁ ମିସାତି ମାନିଙ୍ଗ୍, ପ୍ରବୁଦିମାନୁ ଖେଡ଼ିକା କିଦୁ । ଆଗ୍ତିରାନ୍ ଆମାକା ରାସ୍ତା ମାନାଡ଼, ଆୟାତାନିଙ୍ଗ୍ ମାରିଡେସି କିଦେଙ୍ଗ୍ ନାନ୍ ଖାଦ୍‌ନିକା ଅଡ଼ବିଏ, ଇରିଙ୍ଗ୍ ମି ସୁରକ୍ଷା ଉଣ୍ଟିଙ୍ଗ୍ ଇକା ସାହାଜ୍ୟ କିନାଡ଼ ।

୨ ଆମାକାର୍ ସତ୍ତିସିଲି ପାଣିଦୁ ମିସାତାମାନାର୍, ନୁକୁଡ଼ିଆମାଣ୍‌କୁ ଜାଗରାତା, ତାଗ୍‌ଇ ପାଣିକିନି ଖାରିମାଣ୍‌କୁ ଜାଗରାତା, ସୁନ୍ନଡ଼କିନି ଲୋକାମାଣ୍‌କୁ ଜାଗରାତା;

୩ ଇରିଙ୍ଗ୍ ମାପ୍ ସତ୍ତିତାନ୍ ସୁନ୍ନଡ଼ପୟ୍‌ତି ଲୋକୁ, ମାପୁ ମାପୁରୁଦି ଆମ୍ବାଦାନ୍ ଉପାସନା କିଜିନାପ୍, ମାରି ଆଡ଼ରେରି ରିତିନୀତି ମୁସ୍‌କୁ ଆସା କିଏଣ୍‌ଗା କ୍ରିସ୍ତ ଜିସୁଦିମାନୁ ଗର୍ବ କିନାପ୍ ।

୪ ନାନ୍ ଆଡ଼ରେରି ବିସୟ୍ ମୁସ୍‌କୁ ବା ଆସା କିଦେଙ୍ଗ୍ ଆଟ୍‌ନା, ଜଦି ଆଇକାନ୍ ଏନ୍ ଆଡ଼ରେରି ରିତିନୀତି ମୁସ୍‌କୁ ଆସା କିଦେଙ୍ଗ୍ ଆଟ୍‌ନାନ୍ ଇଜି ଏଡ଼ କିନାନ୍, ଆଡ଼ତିଙ୍ଗ୍ ନାନ୍ ନାଣ୍ଟି କିଦେଙ୍ଗ୍ ଆଟ୍‌ନା;

୫ ନା ଜନମତି ଆଟ୍‌ଦିନ୍ତି ନାଣ୍ଟିଙ୍ଗ୍ ନାନ୍ ସୁନ୍ନଡ଼ ଆତାମାରୁଆ, ନାନ୍ ଇସ୍ରାଏଲ୍‌ତି ଲୋକ୍, ବିନ୍ୟାମିନ୍ କୁଡ଼ା, ପୁରାନ୍‌ଗି ଏବ୍ରିୟ୍, ନିୟ୍‌ମ୍ ମାନାନି ବିସୟ୍‌ତାନ୍ ଅରେନ୍ ପାରୁସି ମାରୁଆ,

୭ ✧ ନା ତାଗ୍‌ଇ ବ୍ୟବ୍‌ଆରତି ଉଣ୍ଡିଙ୍ଗ୍ କ୍ରିସ୍ଟନ୍ ମାଣ୍ଡୁଲିଦିଙ୍ଗ୍ କାସ୍ତୁ
ସିଜି ମାର୍‌ଆ, ମାରି ବ୍ୟବସ୍ଥାଦି ମାଟା ମାନାନି ମାଣ୍ଡୁକୁ ଜଦି ଅରେନ୍
ଦାମ୍‌ଦିକାନ୍ ଆନାନ୍, ଆରତିଙ୍ଗ୍ ନାନ୍ ଦୋସ୍ ସିଲେତା ।

୮ ମାତର୍ ଆମାକାଞ୍ଜିନ୍ ନା ଉଣ୍ଡିଙ୍ଗ୍ ନେଗେଡ୍ ଇଜି ଅଡ୍‌ବିଜି
ମାର୍‌ଆ, ଆୟାଞ୍ଜିନ୍ ନାନ୍ କ୍ରିସ୍ଟଦି ଉଣ୍ଡିଙ୍ଗ୍ ତାଗ୍‌ଇକା ଇଜି ଅଡ୍‌ବିଜିନା
।

୯ କେବଲ୍ ନାସ ସିଲେ; ନା ପ୍ରବୁ ଜିସୁ କ୍ରିସ୍ଟନ୍ ନେସ୍‌ନି ମାଣ୍ଡୁ ଆମା
ନାଣ୍ଡୁ ବୁଦି ପୟ୍‌ତାମାନା, ତାନି ବାଦ୍‌ଲୁ ଞ୍ଜିନ୍ ବିସୟ୍‌ତିଙ୍ଗ୍ ତାଗ୍‌ଇକା
ଇଜି ଏଡ୍‌କିନା; ଝାନି ଉଣ୍ଡିଙ୍ଗ୍ ନାନ୍ ଞ୍ଜିନ୍ ବିସୟ୍‌ତିଙ୍ଗ୍ ଡିସ୍‌ତାମାନା,
ଏଣ୍ଡେସ୍ ନାନ୍ କ୍ରିସ୍ଟନ୍ ପୟ୍‌ଦେଙ୍ଗ୍ ଆଟ୍‌ନାନ୍ ।

୧୦ ମାରି ଝାନି ଝାଲେ ପୁରା ମିସାନି ଉଣ୍ଡିଙ୍ଗ୍, ମାରି ଆୟାଞ୍ଜିନ୍
ବିସୟ୍‌ତିଙ୍ଗ୍ କାସ୍‌ରା ଇଜି ଅଡ୍‌ବିଜିନା । ମାରି, ଆମା ଦାମ୍‌ଦି ନିୟ୍‌ମ୍
ମାନାନି ମାଣ୍ଡୁ ପୟ୍‌ଦେଙ୍ଗ୍ ଆଟ୍‌ନିକା, ଆୟା ନାନି ଇନି ନିଜେଦି ଦାମ୍‌
ନାଦି ସିଲେଡ୍ । ଇଲେଇ ନାଦି ଆମା ଦାମ୍‌ ମାନାଡ୍, ଆକା କ୍ରିସ୍ଟଦିମାନ୍
ବିସ୍‌ବାସ୍ କିନି ମାଣ୍ଡୁ ପୟ୍‌ତାମାନା; ଆକା ମାପୁରୁଦିମାଣ୍ଡୁ ଝାନାଡ୍
ମାରି ଆକା ବିସ୍‌ବାସ୍‌ତି ମୁସ୍‌କୁ ତିଆର୍‌ଆତାମାନାଡ୍ ।

୧୧ ଏଣ୍ଡେସ୍ ନାନ୍ କ୍ରିସ୍ଟନ୍ ନେସ୍‌ନା ମାରି ଝାନି
ମାରିଡେସିଜିବନ୍‌ଆଜିନିଙ୍ଗ୍ ନି ସାକ୍ତି ଏଡ୍‌କିନା; ଝାନି କାସ୍ତୁ ବୋଗ୍‌ତି
ଦଣ୍ଡୁ ଏଡ୍‌କିଜି ସାନିମାନ୍ ବା ଝାନି ଝାଜା ଆନା,

୧୨ ମାରି ସାତିଝାରି ମାଣ୍ଡୁ ମାରିଡେସିଜିଙ୍ଗ୍ ନିକା ପୟ୍‌ଦେଙ୍ଗ୍
ଆସା କିଜିନା ।

ଇତି ବାତିଦୁ ଉର୍‌କୁନିକା

୧୩ ନାନ୍ ଜେ ଇଲେଇ ଆୟାଞ୍ଜିନ୍ ପୟ୍‌ତା ମାନା ମାରି ପୁରା ପୟ୍‌ତା
ମାନା, ଆକା ସିଲେ, ମାତର୍ ନାନ୍ କ୍ରିସ୍ଟ ଜିସୁଦି ମାଣ୍ଡୁ କୁକାୟ୍
ଆତିମାନିଙ୍ଗ୍ ଆକା ଆସିନି ଉଣ୍ଡିଙ୍ଗ୍ ଉର୍‌କୁସିନା ।

୧୪ ଏ ତଡାନ୍‌କୁ ନି ତାଙ୍ଗ୍‌କି, ଇୟାସାନ୍ ନାନ୍ ଇତି
ବାତିଦୁ ଇଏନେ, ମାତର୍ ଉନ୍‌ଡ୍ରି ପାଣିଦୁ ପୁରାମାନ୍‌ଞ୍ଜି, ଝେନ୍‌କା
ଡିସ୍‌ତିଝାତିମାନି ବିସୟ୍‌କୁଞ୍ଜିନ୍ ମୋନ୍‌ତାନ୍ ଆକ କିଜି ଆଗ୍‌ତି ମାନି
ବିସୟ୍‌କୁ ପୟ୍‌ନି ଉଣ୍ଡିଙ୍ଗ୍ ସାନିଜିନିଝାଜା ସେସ୍ତୁ କିଜିନା ।

୧୪ ଆଦେଇଁ କ୍ରିସ୍ତ ଜିସୁଦି ଖାଲେ ଆମା ମୁସକୁପୁରତି ଜିବନ୍ ପୟନି ଉଣ୍ଡିଙ୍ଗ ମାପୁରୁ ନାଙ୍ଗି କୁକ୍ତାମାନାନ୍, ଆୟା ପୁରସ୍କାରତି ଉଣ୍ଡିଙ୍ଗ ଆସା ଇଡ଼ଜି ନାନ୍ ଇତି ବାଡ଼ିଦୁ ଉରକୁସିନା ।

୧୫ ମାରି, ମା ଲୋଇ ଏସଲୋକ୍ ଆମ୍ବାଦାନ୍ ଜିଣାତିମାନିକା, ଖାରି ଇୟାଖାଜା ମୋନ୍‌ଅଡ଼ବିନିକା ତେବାନିକା ନେଗେଡ଼, ମାରି ଜଦି ଇନି ବିସୟତୁ ମି ଅଡ଼ବିନିକା ଅଲଗା ନାନିକା ମନ୍‌ଅଡ଼ବିନିକା ମାନାଡ଼, ଆରତିଙ୍ଗ ମାପୁରୁ ମିଙ୍ଗି ଝିଜୁ ମାଟା ନେସନିଖାଜା ଝେରନାନ୍ ।

୧୬ କେବଲ, ନେରସାସି ମାଡୁ ଆମା ନୟମ୍ ମାନାଜି ଖାଜିନିକା, ଆୟା ଇସାବତାନ୍ ଆଗଡ଼ି ସନିକା ମାନାଡ଼ ।

୧୭ ☆ଏ ତଡ଼ାନକୁ ନି ତାଙ୍ଗିକି, ମିର୍ ଅର୍ସେ ମିସାଜି ନା ଝେନକା ରାଦୁ, ମାରି ମାମାନୁ ଆମା ସାନ୍ତି ସୁଡ଼ଜିନିଦେର୍, ଆମାକାର୍ ଆୟାଈସାବତାନ୍ ବୁଲାସାଲାଜିନାର୍, ଖାରିଙ୍ଗ ସୁଡ଼ଦୁ ।

୧୮ ଇରିଙ୍ଗ ଇୟାଖାଜା ଗାଦିଲୋକ୍ ମାନାଡ଼, ଆମାଖାରି ବୁଲାସାଲାଜି ବିସୟତାନ୍ ନାନ୍ ମିଙ୍ଗି ଗାଦି ଦେବେଙ୍ଗ ଝେରତାମାନା, ମାରି ଇଲେଇବା ଆଡ଼ବାଜି ଆଡ଼ବାଜି ଝେରସିନା, ଖାର୍ କ୍ରିସ୍ତଦି କୁସକାରତି ସାଡୁରୁ;

୧୯ ନରକଦୁ ଖାରି ଜିବନ୍ ସାନି ଉଣ୍ଡିଙ୍ଗ ସଲ୍‌ସିନାଡ଼, ମେନ୍‌ଲ୍ ଆସାନେ ଖାରି ଦିୟାମ୍, ଖାର୍ ନିଜେ ନିଜେଦି ସେମାରତିଙ୍ଗ ଗର୍ବଦି ବିସୟ ଏଡ଼ କିନାର୍, ମାରି କେବଲ ଦୁନିଆଦି ବିସୟତି ଉଣ୍ଡିଙ୍ଗ ଖାର୍ ସିନ୍ତା କିନାର୍ ।

୨୦ ମାଡୁ ମୁସକୁପୁରତି ପ୍ରଜା, ଆୟା ବାଡ଼ିଦାନ୍ ବା ମାଡୁ ରକିୟାକର୍ତ୍ତା ପ୍ରବୁ ଜିସୁ କ୍ରିସ୍ତଦି ଖାନିଦିନ୍‌ତିଙ୍ଗ ଝେଡ଼ିକାଦାନ୍ କାପକିଜି ମାନାପ୍ ।

୨୧ ଖାନ୍ ନିଜେଦି ଆମା ପାଣିଦି ସାକ୍ତି ଦାନ୍ ଝିଜୁ ବିସୟତିଙ୍ଗ ନିଜେଦି ଆଡ଼ଗି କିଦେଙ୍ଗ ଆର୍‌ନାନ୍, ଆୟା ସାକ୍ତିଦାନ୍ ମା ସାକ୍ତିସିଲି ମେନ୍‌ଲ୍‌ତିଙ୍ଗ ବାଦେଲ୍‌କିଜି ନିଜେଦି ଗୌରବମୟ ମେନ୍‌ଲ୍ ଖାଜା କିନାନ୍ ।

୪

ଆଦେସ୍ ମାରି ସିକିୟା

୧ ଲାଡ଼ତି ତଡ଼ାନ୍‌କୁ ନି ତାଙ୍ଗ୍‌କି, ମିଙ୍ଗ୍‌ ସୁଡ଼ନ୍ତି ଉଣ୍ଡିଙ୍ଗ୍ ନା ଏସ୍ ବଦା, ମିଙ୍ଗ୍‌ ଅସିନା ଏସା ଝେଡ଼ିକା, ମି ଉଣ୍ଡିଙ୍ଗ୍ ନା ଏସା ଗର୍ବ । ତଡ଼ାନ୍‌କୁ ନି ତାଙ୍ଗ୍‌କି, ନା ସିକିୟା ଇସାବତାନ୍ ପ୍ରବୁଦିମାନୁ ତିର୍ ତେବାଜି ଜିଜିମାଡ଼ିବୁ ।

୨ ଇୟଦିଆ ମାରି ସୁନ୍ତୁଣ୍ଡୀ ରୁଣ୍ଡିଞ୍ଜାନିକାଙ୍ଗ୍ ନା ଅନୁରୋଦ୍ ଝାକ୍ ପ୍ରବୁଦିମାନୁ ତାଙ୍ଗ୍‌ ଝାଜା ମିସାବିଡ଼ାଜି ମାନିଞ୍ଜି ।

୩ ମାରି, ଏ ନା ବିସ୍‌ବାସ୍‌ତି ଅର୍ସେପାଣିକିନିକାନ୍, ଇୟା ତାଙ୍ଗ୍‌କାଙ୍ଗ୍‌ ସାହାଜ୍ୟ କିନି ଉଣ୍ଡିଙ୍ଗ୍ ନିଙ୍ଗ୍‌ ବା ନା ବାତିଙ୍ଗ୍‌ମାଲ୍‌ଜିନା, ଇରିଙ୍ଗ୍ ଇୟାକେଙ୍ଗ୍ କ୍ଲେମେନ୍‌ସ୍ ମାରି ନା ଆଇ ପାଣିକିନିଞ୍ଜାନିକା ଝାଲେ ସୁସମାଚାର୍ ପାଣିଦୁ ନା ଝାଲେ ପାଣି କିତେମାନେ; ଆୟା ପାଣିକିନିଞ୍ଜାନିକା ଦରୁ ମାପୁରୁଦି “ଜିବନ୍ ପୁସ୍‌କଦୁ” ରାସ୍‌ତାମାନାଡ଼ ।

୪ ପ୍ରବୁଦି ଝାଲେ ମିସାତି ମାନିଙ୍ଗ୍ ଝିଜୁଝାଲେ ଝେଡ଼ିକା କିଦୁ, ମାରିଡ଼େସି ଝେର୍‌ସିନା, “ଝେଡ଼ିକା କିଦୁ ।”

୫ ମି ନେଗି ବ୍ୟବହାର୍ ଝିଜୁ ଲୋକା ଲାକ୍‌ତୁ ତରାପିଡ଼ । ପ୍ରବୁଦି ଝାନିଦିନ୍ ଲାକ୍‌ତୁ ଆତାଡ଼ନି ।

୬ ଇନି ବିସ୍‌ୟତାନ୍ ସିନ୍ତା କିମାଟ୍, ମାତର୍ ମିଙ୍ଗ୍‌ ଆମାକା ଦରକାର୍, ଆକା ପାର୍‌ତନାଦୁ ମାପୁରୁଙ୍ଗ୍ ଲସ୍‌ତୁ । ମାରି ପାର୍‌ତନା କିନିଝାଲେ ଝିଜୁଝାଲେ ଜିବନ୍‌ତି ଦନ୍‌ୟବାଦ୍‌ତି ଝାଲେ ମି ପାର୍‌ତନା ଝିଜୁ ମାପୁରୁଦିମାନୁ ଝେର୍‌ତୁ;

୭ ଆରଡିଙ୍ଗ୍ ଲୋକ୍‌ତି ବୁଜାଦେଙ୍ଗ୍ ଆଟ୍‌ଇକା ମାପୁରୁଦି ସାନ୍ତି କ୍ରିସ୍‌ ଜିସୁଦି ସାକାଦାନ୍ ମି ଜିବନ୍ ମାରି ମୋନ୍‌ତିଙ୍ଗ୍ ନେଗେନ୍‌କିଜି ଇଡିନାଡ଼ ।

୮ ସାରାସାରିଞ୍ଜେନ୍‌କା, ଏ ତଡ଼ାନ୍‌କୁ ନି ତାଙ୍ଗ୍‌କି, ଆମା ଝିଜୁ ନେଗିକା ମାରି ଝେଡ଼ିକାଦି ବିସ୍‌ୟ ମାନାଡ଼, ଆମା ଆମାକା ସଡ଼, ଆମା ଆମାକା ପେରିକା, ଆମା ଆମାକା ଟିକ୍, ଆମା ଆମାକା ପୁରାନେଗିକା, ଆମା ଆମାକା ଲୋକ୍‌ତିଙ୍ଗ୍ ନେଗିକା, ଆମା ଆମାକା ସନ୍‌ମାନଜନକ, ଆୟାଝିଜୁ ବିସ୍‌ୟ ସିନ୍ତା କିଦୁ ।

୯ ମିର ଆମାଣ୍ଡକୁ ବିସୟ ନା ମାଣ୍ଡକୁ ଅଜାତିମାନିଦେର,
ପୟତିମାନିଦେର, ଝେରୁଇମାନିଦେର ମାରି ନା ମାନ୍
ସୁଡ଼ୁତିମାନିଦେର, ଆୟାଣ୍ଡକୁ କିନ୍ତୁ; ଆବେନ୍ ସାନ୍ତିଦାତା ମାପୁରୁ
ମି ସାକା ଆନାନ୍ ।

ଦାନତି ଉଣ୍ଡିଙ୍ଗ୍ ଦନ୍ୟବାଦ୍

୧୦ ପ୍ରବୁଦି ଖାଲେ ମିସାଜି ଜିଜି ମାଡିନି ଖାଲେ ନା ଝେଡିକା
ଜେ, ମିର ନା ଉଣ୍ଡିଙ୍ଗ୍ ମନ୍ ସିଦୁ । ନାଣୁ ଦିନ୍ ଝେନ୍‌କା ମାରିଡେସି
ବାଦେଲ୍‌ଆନିକା ତରତିମାନି । ନାନ୍ ଇନ୍‌ଏ ଜେ, ମିର ଇୟାଦାପ୍ରେ ନା
ଉଣ୍ଡିଙ୍ଗ୍ ମାରି ମୋନସିଇ ମାରୁଇଦେର, କେବଲ୍ ଆକା ଝେରୁଡେଙ୍ଗ୍
ସୁଜୋଗ୍ ପୋଇତିମାରୁଇ ।

୧୧ ନାନ୍ ନିଜେଦିଙ୍ଗ୍ ଝେଡାଆଜିନାଡ୍ ଏଡକିଜି ଇୟା ମାଟା ଇନ୍‌ଏ,
ଇରିଙ୍ଗ୍ ନାନ୍ ଏଣ୍ଡେସ୍ ନାନି ଅବସ୍ଥାଦାନ୍ ମାନା, ନାନ୍ ନାସଦାନ୍‌ନେ
ଡିର ତେବାଦେଙ୍ଗ୍ ସିକିୟା କିତାମାନା ।

୧୨ ଉଣା ଆପିଡ୍ ମାରି ନାଣୁ ଆପିଡ୍, ଏଣ୍ଡେସ୍ ତାନି ସାମାନା
କିଦେଙ୍ଗ୍ ଆନାଡ୍, ଆକା ନାନ୍ ନେସ୍‌ତାମାନା । ଆଦେଙ୍ଗ୍ ଆମା
ଇନି ବେଡାଦୁ, ଆମା ଇନି ଅବସ୍ଥାଦାନ୍ ମାରି ବାଙ୍ଗାଦୁ ତେବାତି
ଖାଲେ ଏଣ୍ଡେସ୍, ପଟାପାଜିତି ଝେନ୍‌କା ବା ଆୟାଞ୍ଜାଜା, କାକୁର୍ ଆନି
ବେଡାଦୁ ମାରି ନାଣୁ ଦୁବା ନାନ୍ ଝିଜୁଦିନ୍ ସାମାନ୍ ।

୧୩ ନା ସକ୍ତିଦାତା କ୍ରିସ୍ତୁଦି ସାହାଜ୍ୟଦାନ୍ ନାନ୍ ଝିଜୁ କିଦେଙ୍ଗ୍
ଆଟ୍‌ସିନା ।

୧୪ ମାରିବା ମିର ନା ଦୁଃକ୍‌ବୋଗ୍‌ତି ବେଡାଦୁ ମିସାଜି ପେରି ପାଣି
କିତିମାନିଦେର ।

୧୫ ଏ ପିଲିପିୟଦି, ତଡାନ୍ ନି ତାଙ୍ଗ୍‌କ୍ ମିର ବା ନିଜେ
ନେସ୍‌ନିଦେର ଜେ, ସୁସମାଚାର୍ ପ୍ରଚାର୍ କିନି ଆରାମ୍ ବେଡାଦୁ,
ଏସ୍ତିଖାଲେ ନାନ୍ ମାସିଦୋନିଆଦାନ୍ ଡିସ୍‌ତା ସର୍‌ଆ, ନାସ୍ତିଖାଲେ
ନିଙ୍ଗ୍ ଡିସ୍‌ତିଙ୍ଗ୍ ମାରି ଆମା ମଣ୍ଡୁଲି ନା ଖାଲେଅର୍‌ସେ ଆଜି ନା
ଖାଲେ ସିନିକା ଅନିକା ଇସାବ୍ ଇଡ୍‌ଏର୍ ମାର୍‌ହାର୍ ।

୧୭ ✠✠ ଇରିଙ୍ଗ୍ ତେସଲନିକିୟାଦୁ ନାନ୍ ମାନି ବେଡାଦୁ ମିର୍ ଅରସୁ ନି ନାଣ୍ଟ ଦେବେଙ୍ଗ୍ ନା ଲାକ୍ତୁ ଦରକାର୍ତି ସାହାଜ୍ୟ ପୋକ୍ତାତି ମାର୍ଜଦେର୍ ।

୧୮ ମିମାଣ୍ଟକୁ କେବଲ ଦାନ୍ ଅତେଙ୍ଗ୍ ନାନ୍ ଅଡ଼ବିଏ; ଇୟାତାନି ବାଦ୍ଲୁ ମିର୍ ଏଣ୍ଡେସ୍ ନାଣ୍ଟଦାନ୍ ନାଣ୍ଟ ପୟ୍ଦୁ, ଇକା ନା ବଦା ।

୧୯ ମିମାଣ୍ଟକୁ ନାନ୍ ପୟ୍ତିମାନି ଝିଜୁ ଦାନ୍ ଉଣ୍ଡିଙ୍ଗ୍ ପୋୟ୍ତିକା ମାନାଜି ଜାଣେକିଜିନା । ଆକା ନା ଉଣ୍ଡିଙ୍ଗ୍ ନାଣ୍ଟଦାନ୍ ନାଣ୍ଟ ଆତାମାନାଡ଼, ଏପାପ୍ରଦିଡ଼ି କିୟୁଦୁ ମିର୍ ପୋକ୍ତାତିମାନି ଦାନ୍ ନା ଝିଜୁ ସିଲିମାନୁ ପୁରା କିତାମାନାଡ଼ । ଆକା ମାପୁରୁଦି ଉଦେସ୍ତାନ୍ ସିତିମାନି ବାସନାଆନି ଦୁପୁଣି ମାରି ଝାନି ମାନାନିନାକା ମାରି ଝେଡ଼ିକାଦି ବଲିପୁଜାସିନି ଝାଜା ।

୨୦ ମାରି, ନା ମାପୁରୁ କ୍ରସ୍ତ ଜିସୁଦିମାନୁ ଝାନି ଗୌରବ୍‌ମୟ୍ ପାଣିଦି ଇସାବ୍‌ତାନ୍ ମି ଝିଜୁ ଅଭାବ୍ ପୁରା କିନାଡ଼ ।

୨୧ ମା ମାପୁରୁ ମାରି ବୁବାଦି ଉଣ୍ଡିଙ୍ଗ୍ ଜୁଗ୍ ଜୁଗ୍ ଗୌରବ୍ ଆପିଡ଼ । ଆମେନ୍ ।

ସାରାସାରି ମାଟା

୨୨ କ୍ରସ୍ତ ଜିସୁଦି ଦର୍ତ୍ତାନ୍ ଝିଜୁ ସାଦୁରିଙ୍ଗ୍ ନମସ୍କାର୍ ଜାଣେକିଦୁ । ନା ଝାଲେ ମାନି ତଡ଼ାନ୍‌କୁ ନି ତାଙ୍ଗ୍‌କି ମିଙ୍ଗ୍ ନମସ୍କାର୍ ଜାଣେକିଜିନାର୍ ।

୨୩ ଇବେନ୍ନୁ ମାନି ମାପୁରୁଦି ଲୋକୁ, ବିସେସ୍‌ତାନ୍ ଆମାକାର୍ କାଈସର୍ତି ମେଡ଼ିଲ୍‌ଲୁଦୁ ମାନାର୍, ଝାର୍ ମିଙ୍ଗ୍ ନମସ୍କାର୍ ଜାଣେକିଜିନାର୍ ।

୨୪ ପ୍ରବୁ ଜିସୁ କ୍ରସ୍ତଦି ଦୟା ମି ଆମ୍ବାଦି ଝାଲେରାନ୍ ତେବାପିଡ଼ ।

ମାପୁରୁଦି ସବ୍ ବାକ୍ୟ

The New Testament in the Konda Porja Lanugage of India. Konda-Dora: ମାପୁରୁଦି ସବ୍ ବାକ୍ୟ (Bible)

copyright © 2020 The Word for the World International and Konda Porja Translation Samithi, Dasamanthpur, Odisha

Language: Konda Porja (Konda-Dora)

Contributor: The Word for the World South Asia

ମାପୁରୁଦି ସବ୍ ବାକ୍ୟ

ପୁନଃ ନିର୍ମାଣ, 2020

The New Testament in Konda Porja Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-07

PDF generated using Haiola and XeLaTeX on 6 May 2025 from source files dated 7 May 2025

506ae627-08e2-556a-b39e-5315f886d95a